



Nuuk, 23.januar 2012

Inatsisartut suleriaasianni § 37 imm. 1 naapertorlugu Naalakkersuisunut apeqqutit imaattut matumuuna saqqummiuppakka:

09.november (sagsnr. 2011-057776) akissutissinnut apeqqutsinik nangitsineq.

Inatsit imaluunniit Peqqussut suna tunngavigalugu, Pissiani Pinngorsuarmilu inissat ingerlanneqarnerat A/S Ini-mit akisussaaffigitinneqarani suliffeqarfimmut illuutinik niuerutiginnittumut namminersortumut aqutsinneqarpat?

Ilumoorinnaava A/S INI Pissiani Pinngorsuarnilu inissianik aqutsinissaminut piginnaaneqanngitsoq? Aqutsinissaminut piginnaaneqannginneranut suna tunngavigineqarpa?

Pinngorsuarni inissiat attartortittakkat ineqanermut akiliutaat, Namminersorlutik Oqartussat inissiaataannik allaniit kvadratmeterimut akisunerunerannut suna tunngaviuva? Naminersorlutik Oqartussaat Nalunaarutaat nr.12, 23. april 2008-imeersoq § 72-79 naatsorsuinermi tunngavigineqarsimanerluni?

Illuutinik niuerutiginnittarttoq inissianik attartortittakanik aqutsisuutinneqarneranut tuniniaasarneranullu qanoq annertutigisumik akilerneqartarpa?

Tuapannguani napasuliami 7-imi inuinnarnut attartortinneqartut, napasuliani 4, 5, 6-imilu Namminersorlutik Oqartussani sulisuusuullutik attartortuniit sooq sakkortunerusumik piumasaqaateqarfigineqarpat?

Malik Berthelsen aamma Kim Kielsen, Siumut

Tunngavilersuut:

1. Apeqqutsitsinni siullermi Pissiani Pinngorsuarmilu inissiat A/S Ini-imit aqunneqannginnerat, **Inatsisartut peqqussutaannik nr.12, 28.oktober 1993-imeersumi § 2, imm. 2-imut** naapertuutinnginnersoq erseqqissumik akineqanngimmat apeqqutigeqqipparput. Peqqussummimi allassimavoq Namminersornerullutik Oqartussat inissiaataasa aqunneqarnerat ingerlanneqarnerallu inissiaatileqatigiiffiup A/S Ini-ip suliassarigai. Tamatumunnga tunngatillugu peqqussutit sukkut sanioqqunneqarsinnaanera nassuiaateqarfigeqquarput.
2. Tupigusuutigaarput inissiaatileqatigiiffik A/S Ini, Namminersorlutik Oqartussat inissiaataannik attartortittakkanik 6.500-inik ingerlatsillunilu aqutsinneqartoq, Pissiani Pinngorsuarmilu aqutsinissaminik piginnaaneqanngitsutut Naalakkersuisunit nalilerneqarsimammat. A/S Ini Pissiani aqutsinissaminut piginnaaneqarsimangippat, taava sinerissami illoqarfinni allani tamani sooq A/S Ini aqutsisuutinneqarpa?
3. Oqaatigineqarpoq Pinngorsuarni inissiat suliariumannittussarsiuunneqarneranni kvadratmeterimut akimik (13.082kr.) pitsaalluinnartumik angusaqartoqarsimasoq. Ineqarnermullu Naalakkersuisup arlaleriarluni oqaatigisarpaa atuisut ineqanermut akiliutissaasa minnerpaaffiiminniissaa anguniarlugu sanaartornermut akikinnerpaq qinertarnissaa pingaartillugu. Taamaakkaluartoq Pinngorsuarni inissiat inissianik allaniit akiliutaat qaammammut kvadratmeterimut 17kr. missaanik, tassa inissiamut 73m²-imut

1.200kr.-imik akisunerupput, naak sanaartorneranni akimik pitsaasumik isumaqatigiittoqarsimagaluartoq. Ineqarnermut akiliutit taamat nikingatiginerannut suna tunngaviuva?

4. Tuapannguani napasuliami 7-imi inuinnarnut attartortinneqartuni najugaqartut qularnaveeqqusiinermut qaamatinut 6-innut akiliisinneqartassasut aammalu attartornerminniit taamaatsiniarunik qaammatinik 3-inik sioqqutsillutik nalunaaruteqartarnissaat piunasaqaataavoq. Illuatungaani Namminersorlutik Oqartussani sulisut qaammatinut 3-inut qularnaveeqqusiisassapput attartornerminiillu taamaatsiniarunik qaammammik 1-imik sioqqutsillutik nalunaaruteqassallutik. Siumumi isumaqarpugut innuttaasunik taamatut assigiinngisitsineq akuersaarneqarsinnaanngitsaq. Taamaattoqarneranut suna tunngavigineqarnerisq kissaatigaarput.